



Број/Број: 03/1-50-14-7-7/11

Сарајево/Sarajevo, 9. 11. 2011. godine

**PREDMET:** Informacija o održanom sastanku sa komandantom i zamjenikom komandanta NATO Štaba u Sarajevu

Članovi Kolegija Zajedničke komisije za odbranu i sigurnost BiH (ZK), Dušanka Majkić-predsjedavajuća, Šefik Džaferović-drugi zamjenik predsjedavajuće i Željko Grubešić, stručni savjetnik dana 18.10.2011., održali su sastanak sa brigadnim generalom Garry Huffman komandantom i brigadirom Olsenom zamjenikom komandanta NATO Štaba u Sarajevu.

Sastanku su prisustvovali i Rohan Maksvel, šef Savjetodavnog tima i Lejla Hadžihasanović.

U uvodnom dijelu Dušanka Majkić je istakla sljedeće:

- Da je cilj sastanka je da se razgovara o aktivnostima koje slijede.
- Da je saradnja Zajedničke komisije i NATO Štaba u Sarajevu nakon konstituisanja, jula 2011. vrlo dobra.
- Da realizujemo brojne zadatke i ovog momenta može se konstatovati da nema aktivnosti gdje ZK nije dobila podršku NATO Štaba.
- Da se saradnja odvija kroz programe koji se realiziraju kroz Godišnji orijentacioni plan rada.
- **Da su Težišne aktivnosti u saradnji tokom 2011. sljedeće:**
  - Presentacija za članove komisije o temi: Novi NATO strateški koncept,
  - Podrška u organizaciji budžetske konferencije,
  - Podrška u organizovanju konferencije o temi: Stanje bezbjednosti u BiH,
  - Podrška u pružanju usluga prevođenja sa jezika koji su u upotrebi u PS BiH na Engleski jezik,
  - Podrška u organizovanju posjeta PS BiH od strane Komiteta NATO PS, oktobar 2011,
  - Podrška u realizovanju posjete NATO Parlamentarnoj skupštini i NATO Štabu Brisel.

Ono što je posebno aktuelno je priprema prijedloga Zakona o parlamentarnom nadzoru i početak rada Istražne komisije PS BiH za utvrđivanje stanja po pitanju uništavanja viškova municije i naoružanja. Mi u obe ove aktivnosti očekujemo pomoć NATO Štaba na

ekspertnom nivou jer znamo da imate stručnjake koji duže vrijeme prate procese tranzicije u sektoru odbrane i bezbjednosti.

Isto tako, potpuno smo svjesni aktualnih problema u sektoru odbrane u Bosni i Hercegovini. Posebno želim istaći probleme sa viškovima zastarjele municije i naoružanja, sa rješavanjem pitanja neperspektivnih lokacija, sa aktivnostima oko izrade „Pregleda odbrane“, kao i sa niz drugih problema koji se što prije trebaju rješavati da bi nastavili sa realizacijom Akcionog plana za članstvo MAP.

Tu nam je Vaša pomoć jako bitna, kako u vidu ekspertiza, tako i stručna i savjetodavna mišljenja i preporuke.

Brigadni general Huffman je upoznao članove ZK sa aktivnostima NATO Štaba u Sarajevu gdje je istakao sljedeće:

- NATO Štab je u proteklom periodu posjetio 49 opštine u Republici Srpskoj s ciljem promovisanja informativne NATO kampanje. U svim sredinama su primljeni srdačno i iskazan je veliki interes za prezentacije. Vođen je otvoren razgovor o brojnim pitanjima.
- Predstavnicima NATO štaba obišli su i sve kantone u Federaciji BiH. Vođeni su razgovori po istom principu kao i u Republici Srpskoj tako da su u cjelini postignuti ciljevi.
- Tokom razgovora sa oko 5 000 vojnika, podoficira i oficira u kasarnama te sa oko 3 000 studenata širom BiH predstavljen je Novi strateški NATO koncept

Brigadir Olsen, zamjenik komandanta NATO Štaba je tokom razgovora naglasio sljedeće:

- NATO Štab je spreman pomoći u pripremi Prijedloga zakona o parlamentarnom nadzoru gdje je neupitna podrška u organizaciji regionalne konferencije o tom pitanju s ciljem da se razmijene iskustva u toj oblasti,
- Rad Istražne komisije PS BiH po pitanju uništavanja viškova municije i vojne opreme spremni su podržati timom eksperata s ciljem da se postigne puna transparentnost te da se utvrdi odgovornost onih koji nisu izvršili obaveze koje su trebali kako misijom koju imaju tako i kroz druge aktivnosti koje prate taj proces,
- Dokument “Pregled odbrane” je izuzetno bitan i NATO Štab će pomagati taj proces u mjeri u kojoj će isti doprinjeti svojoj svrsi, a postavljeni ciljevi i dalje trebaju biti potpuno jasni i transparentni.

Dušanka Majkić je nakon izlaganja generala Huffmana i Olsena komentarisala njihova izlaganja. Pitala je goste iz NATO Štaba kako je moguće da se pravi Pregled odbrane bez jasnog političkog stava o budućnosti Oružanih snaga i sektora odbrane u cjelini? Očito je da imamo različite političke poglede, te je pitala predstavnike NATO kako to da učestvuju u aktivnostima koje nisu jasno definisane. Puno novca se troši, a efekti su mali. Time se dovodi u pitanje integritet OS BiH jer dosta je nepovjerenja mlađih prema starijim u OS BiH, ima pojava korupcije i nepotizma, a odnos broja vojnika na jednoj strani (3700) i podoficira i oficira na drugoj strani (5000) je nedopustiv. Konstatovala je da je očito zadovoljan jedan broj starijih oficira jer je njima dobro.

Brigadir Oslen je dao odgovore na neka od postavljenih pitanja predsjedavajuće Majkić. Naglasio je da u pripremi dokumenta “Pregled odbrane” predstavnici NATO učestvuju na profesionalnim principima. U OS BiH nije sve savršeno i to nije lako postići. OS BiH treba pomoći da prevaziđu brojne poteškoće te se trebamo na to usmjeriti. Treba ići u kasarne i uvjeriti se u pravo stanje. Nužno je razgovarati i sa vojnicima i generalima te sa svih aspekata sagledati probleme i suočiti se sa izazovima kojih nije malo. Sa jedinicama OS BiH u Misiji ISAF koji su u sastavu Danskog kontigenta trebamo biti ponosni. Veliki su profesionalci i to nam treba biti primjer.

Šefik Džaferović je izrazio zadovoljstvo održanim sastankom. Potrebno ih je držati češće i saradnju sa NATO stalno unaprijeđivati. Proces ide i razlozi zastoja u tranziciji su političke prirode. To treba otkočiti i striktno poštovati zakone. OS BiH se svojim dosadašnjim rezultatima uklapaju u regiju kako po pitanju budžeta tako i po niz drugih parametara. Poteškoća ima, ima i slabosti, ali ih trebamo rješavati. Za to ima snaga, ima stručnih ljudi i imamo jasne ciljeve.

PREDSJEDAVAJUĆA  
ZAJEDNIČKE KOMISIJE  
**Duška Majkić**

Dostavljeno:

- naslovu
- a/a